

20

"Libertas"
(lema)

EPIFANIAS

1

CANTADE

Cantade,
favelas;
sorride,
cadeas;
morrede
miserias
e dores
e guerras,
que o cáliz
da estrela,
o Neno
da Nena,
florece
nas veas
e cravos
da Terra.

Cantade
de veras,
eixadas,
cadeas,
martelos,
favelas
e sudras,
que é festa
nos ceos
da Terra.
;Cantade!

ERA

Era pan e más pomba,
era áncora e dorna,

alborada de amor
e cordeiro e timón.

Era vento e más broa,
era lar e lagoa

de mil seos de sol,
de mil peixes de amor.

Era áncora e dorna,
era pan e más pomba;

libertade é más cruz
era o Neno Xesús.

GASPAR, MELCHOR, BALTASAR

Gaspar, Melchor, Baltasar,
¿que vistes naquel Portal?
- Vimos á Lúa e ó Sol
parindo millos de amor.

Gaspar, Melchor, Baltasar,
¿que había naquel adral?
- Había dornas de gracias
e mil Ladrás de esperanza.

Gaspar, Melchor, Baltasar,
labregos da Terra Cha,
¿que lle levastes ó Neno
na ermida do voso peito?

- Levámoslle catro bágoas,
tres lúas e toda a saiva
que recollemos nos leiros
fouce a fouce, berro a berro.

Gaspar, Melchor, Baltasar,
ilotas da Terra Cha,
non temades ás tenaces
nin ós alacráns temades,

que ese Deus está convosco
e con aqueloutros povos
que teñen fe nun mañá
de xusticia e más de paz.

EPIFANIA

Durme, noso Neno, durme,
durme no colo de vida
que che está a tecer Begonte,
e mañá ó raia-lo día

xa apagarás eses lumes,
eses tronos e esas iras
que acesos temo-los homes
nesta cloaca de víboras.

Durme, Xesusiño, durme,
que mañá serás mesías,
asilo, verdade e norte.

Durme, noso Neno, durme,
durme no templo de vivas
que che levantou Begonte.

O lema "Libertas" corresponde a Xosé Carlos Gómez Alfaro, ourensán, natural de As Chabolas (Ribadavia), licenciado en Xeografía e Historia e profesor de B.U.P. do Colexio P.P. Somascos de A Guarda (Pontevedra).

En 1969, edita un poemario en castelán: "De rodillas". Poeta en galego, ten acadado varios premios tanto en poesía coma en xornalismo.

Enderezo:

C/ Concepción Arenal, nº 21 - 3º
A Guarda (Pontevedra) Tel. 61 09 75